


# 民國叢書

第五編

• 49 •



# 民國叢書

第五編

· 49 ·

文學類

宋文學史

遼金元文學史

明文學史

清代文學

柯敦伯著

吳梅著

宋佩韋著

張宗祥著

上海書店

---

張宗祥著

清  
代  
文  
學

---

編主五雲王  
庫文有萬

種千一集一第

學文代清  
著祥宗張

路山寶海上  
館書印務商 者刷印兼行發

埠各及海上  
館書印務商 所行發

版初月十年九十國民華中

究必印翻權作著有書此

---

The Complete Library  
Edited by  
Y. W. WONG

---

LITERATURE OF TSING DYNASTY

By  
CHANG TSUNG SIANG  
THE COMMERCIAL PRESS, LTD.

Shanghai, China

1930

All Rights Reserved

B  
五  
八  
七  
分

1198 B 26

本書據商務印書館1930年版影印

# 清代文學

## 緒論

凡文學之變遷分爲三種，而世人所謂工拙者不與焉。一，因遞演而變者。例如：西漢變爲東漢，東漢變爲魏晉，魏晉變爲六朝，以次推移，化散爲整，化整爲工，化工爲麗；苟執六朝之文與西漢文並觀，相去之遠，奚啻霄壤；自西漢、東漢、魏、晉、六朝，循序誦之，乃正如四時之代謝，不見有推移之跡；此所謂遞演者也。二，因極盛而生反響者。凡物盛則必敝，文學習尙，何獨不然。六朝之敝，至唐初而極，李諤論之，體書曰：『連篇累牘，不出月露之形，積案盈箱，惟是風雲之狀；』非虛語也。韓昌黎、柳柳州起而矯之，救之以質，其勢若逆而實順，於是文學上自漢至六朝遞演之習革，而古文辭之名成立矣。此所謂反響也。三，特立不受拘束者。舉世風靡，凡草皆偃，聰明特達之士，決不隨之而靡；非故立異，兔網不能

鴻鵠，嚴霜不能凋松柏，彼自遂其志，全其真耳。故楚有屈原，漢有王充，此所謂特立獨行之文也。此三例者，幾於一定。

三例既明，請言三習：一、文章之士必以學問爲根據，根據既定，文之發現於外者其氣象亦自不同。然學問之途，千流萬派，既有所偏，遂以成習。劉更生父子深於經，其文淵雅質直；劉知幾深於史，其文議論疊出；柳子厚、蘇老泉深於子，其文峭刻恣肆；此學問之習成之也。二、時代變遷，文字隨異，史記字少，敍及三皇、班書字多，僅記一代；昔人斷爲史漢優劣，實亦時代囿之。若必以近世爲劣，往古爲工，則紀事必仿尚書之粵若稽古，編年必仿春秋之春王正月，正如新莽學周公耳。優孟衣冠，精神不寄，有何可取。故時代之習既成，學者但當知此是時代之習，不當因其習以分優劣也。三、自唐以下，文始有派，昌黎雖有矯正輕薄之功，亦實開門戶紛爭之弊。自此之後，不先求文之本源，但先論文之形式：章法如何，句法如何；是否某派，抑或有異；所爭者在此不在彼，於是乎學問荒落，而文章獨立矣。此猶無糧儲，無器械而名之曰兵，其服裝步伐，望之誠似兵矣，能一戰耶？此派別之習最爲誤人者也。予之著此篇也，欲人知文章之變遷及其根本，而瞭然於習慣習弊之間，故先舉其凡如此。

## 二 清初文學概述

清初文學上承明代；然明代自王陽明治學，歸震川治文，前後七子治詩之後，其薪火之傳，復何如耶？無論王氏之學談性命，參禪理，一無實際；歸氏之文囿於鄉里，但工小品，絕無鉅製；七子之詩活剝工部，生吞謫仙，一無自然之趣，就其末流以言，弊更滋甚；即舍此數子外，復有何人可以相繼耶？是本源之地薄矣。其所以薄者，聰明才智之士，盡爲製藝試帖所牢籠，目文章爲古文雜作，目學問爲雜學外道，故汨沒於代聖立言之八股，翦裁工麗之五言八韻中，而文學遂不可問也。迨明之季，遼事日棘，流寇披猖，海內大擾，有識之士知時藝之無用，棄而治學，務求實在，於是士習一變，學問一新，而文學亦以之改絃易轍。其究也，未救明季之危亡，適開清代之文運。人清之後，故國之念不絕於心，既不願食周粟，遂乃潛心殫慮，治學歿世。故其人則明代之遺民，其實則清代文學開國之元勳也。當是時湖廣則有王船山，江浙則有顧亭林、黃梨洲，皆高尚其志，不事王侯而應之者若關中李二曲、太原傅

青主，閻百詩，浙東萬氏兄弟，江西魏氏兄弟。其不安於西山薇蕨者，復有若錢牧齋，吳梅村，侯朝宗；以視明代開國之際，僅有劉誠意，宋學士，高青邱寥寥數人，蓋大有間矣。

述顧亭林黃梨洲王船山

顧炎武初名絳，字寧人，世稱亭林先生，江南崑山人。生明萬曆四十一年（一六一三）。本世家子，自幼性情耿介，而聰穎絕倫。家中藏書素富，先生因得博覽載籍。鑑於國事日非，乃留心經世之學，遍覽諸史，及明代各朝實錄，先賢遺文，以至天下圖經，公移邸抄之類，凡有關民生利害者，輒記錄之，參以旁證，著天下郡國利病書。未成而國難作。清師南下，先生抗義失敗。其母王氏絕粒殉國，遺命先生，不仕兩姓。先生眷念故國，觀察東南，知難集事，四十以後，浩然北遊，往還於河北諸邊塞者十餘年，所至載書與俱，遇關河阨塞，輒招老兵退卒，田父野老，而諮詢之，如有不合，則出書勘對。或於衝要地方從事墾殖。最後，卜居陝西之華陰，以爲『綰轂關河之口，雖足不出戶，而能見天下之人，聞天下之事。一旦有警，入山守險，不過十里之遙。若志在四方，則一出關門，亦有建瓴之勢。』志士心腸，於焉可見。康熙二十一年（一六八二），客死山西曲沃。年七十。著述甚夥，日知錄三十六卷最精，自言『平

生之志與業皆在其中。『餘如音學五書天下郡國利病書詩文集亦皆傳世之作。先生自少工文，嘗與同里歸莊——字玄恭，有光之孫——共遊復社，會文講藝。其與徐原一書云：『未登弱冠之年，卽與斯文之會，隨俊之後塵，步楊班之逸躅，人推月旦，家擅雕龍。』後則益自矜重，告人曰：『宋史言劉忠肅每戒子弟曰：「士當以器識爲先，一命爲文人，無足觀矣。」僕自一讀此言，便絕應酬文字，所以養其器識而不墮於文人也。懸牌於室，以拒來請。中孚爲其先妣求傳再三，終已辭之。蓋止爲一人一家之事，而無關於經術政理之大，則不作也。』（與人書十八。）又曰：『君子之爲學，以明道也，以救世也，不以詩文而已，所謂雕蟲篆刻，亦何益哉！』（與人書二十五。）

黃宗義，字太冲，世稱梨洲先生，浙江餘姚人。生明萬曆三十八年（一六一〇）。父尊素，天啓間爲魏閹所害。崇禎卽位，先生年十九，入都訟冤，袖長鉞擊殺害父獄卒，事得昭雪。歸而折節讀書。時山陰劉宗周講學於蕺山，先生秉遺命從之遊，學大進。國變以後，崎嶇海嶠，屢興義師，又爲魯王乞師日本，終無成功。其自述有云：『自北兵南下，懸書購余者二，名捕者一，守圍城者一，以謀反告訐者三，絕氣沙墀者一晝夜，其他連染邏哨所及，無歲無之，可謂瀕於十死者矣。』（南雷餘集怪說。）明統既

斷，乃絕意國事，奉母鄉居，從事述作。先生之學，博大精深，全祖望曰：「公以濂洛之統，綜合諸家，橫渠之禮教，康節之數學，東萊之文獻，艮齋之經濟，水心之文章，莫不旁推交通，自來儒林所未有也。」嘗謂：「明人講學，襲語錄之糟粕，不以六經爲根柢，束書而從事於遊談。」故受業者必先窮經。經術所以經世，方不爲迂儒之學，故兼令讀史書。又謂：「讀書不多，無以證斯理之變化；多而不求於心，則爲俗學。」（凡受先生之教者，不墜講學之流弊。其所著明儒學案六十二卷，及宋元學案之一部，（僅成十七卷，餘爲其子百家與全祖望所續編。）則我國學術史之創作也。明夷待訪錄二十篇，力倡民權，同時如顧亭林輩已極重視之，而影響於晚近思想界者，蓋尤鉅焉。此外經部有易學象數論，孟子師說，春秋日食歷，深衣考，律呂新義等。其授書隨筆乃未全之書，今所見僅傳鈔之本，故或誤爲一卷。書中所述，自書籍聚散以至尺寸度量，所載至廣，非一端也。而傳者泥於書之一字，斷爲因閻百詩問尙書而告之者，無乃妄歟？史部有明史案二百四十四卷，今水經，四明山志，贛州失事，永歷紀年，紹武爭立紀，四明山寨紀，海外慟哭紀，日本乞師紀，舟山興廢，沙定洲紀，亂賜姓始末，汰存錄。歷算有授時歷注，大統歷推法，授時歷假如，回回歷假如，歷代甲子考，勾服圖說，開方命算，割圓八線解，測圓要義。

等。其遺文則自南雷文定，凡五集，晚年自刪爲南雷文約四十卷。又嘗輯明代文爲明文海四百八十二卷。又續輯宋文鑑元文鈔等皆未成。先生文不名一家，晚年忽愛謝皋羽所處之境同也。全祖望議先生『文人之習氣未盡，以正誼明道之餘技，猶留連於枝葉。』亦頗中肯。

王夫之，字而農，號薑齋，世稱船山先生，湖南衡陽人。生明萬曆四十七年（一六一九）。少負異才，讀書十行俱下。張獻忠陷衡州，士類多污以僞命，不從者投之湘江，先生幾遭不測。旋從桂王，授行人，爲羣小所扼，棄職歸。桂王既敗亡，乃晨夕杜門，不復出與社會接近。著書極多，然以僻在偏隅，絕少知者。嘉道間新化鄧顯鶴湘皋始爲編一書目。同治間，湘鄉曾國荃爲刻成七十七種，未刊及已佚者尙不少；其最通行者爲讀通鑑論宋論俟解等，文章堅勁，別具風格。卒康熙三十一年（一六九二）。年七十四。

亭林先生與友人論學書曰：『竊歎夫百餘年來之爲學者，往往言心言性而茫然不得解也。命與仁，夫子之所罕言也。性與天道，子貢之所未得聞也。性命之理，著之易傳，未嘗數以語人。其答問上，則曰：「行己有恥。」其爲學，則曰：「好古敏求。」……顏子之幾乎聖也，猶曰：「博我以文。」其告哀

公也，明善之功，先之以博學。自曾子而下，篤實無若子夏，而其言仁也，則曰：「博學而篤志，切問而近思。」今之君子則不然。聚賓客門人之學者數十百人……而一皆與之言心言性。舍多學而識以求一貫之方。置四海之困窮不言，而日講危微精一之說，是必其道之高於夫子，而其門弟子之賢於子貢……也。我弗敢知也。孟子一書，言心言性，亦諄諄矣。乃至萬章、公孫丑、陳代、陳臻、周霄、彭更之所問，與孟子之所答者，常在乎出處、去就、辭受、取與之間……是故性也，命也，天也，夫子之所罕言，而今之君子之所恆言也。出處、去就、辭受、取與之辨，孔子孟子之所恆言，而今之君子之所罕言也……愚所謂聖人之道者，如之何？曰：博學於文，曰：行己有恥。自一身以至於天下國家，皆學之事也。自子臣弟友以至出入、往來、辭受、取與之間，皆有恥之事也。士而不先言恥，則爲無本之人。非好古多聞，則爲空虛之學。以無本之人而講空虛之學，吾見其日從事於聖人而去之彌遠也。」張宗祥曰：「亭林先生此書實在懲宋學末流，專講性命，妄立門戶，空疏之弊既深，攻訐之習復起，志欲救之以節氣，導之以實學，故一篇之中，反覆諄諄如此。若認爲漢學與宋學分道揚鑣之宣言，猶淺見也。而予之錄此書，及兼引黃王諸先生者，就表而論，若與文學無關；實則文學之士非好古多聞不可。倘僅就文求文，此正賊

假衣服，稗販如來耳，迨有生天之望耶？故論清初文學，與其歸功於侯魏諸人純粹文學之士，不如歸功於顧王諸先生碩學之士。此予所以斷清初文學必以諸先生爲元勳，而侯魏反居其次也。」

述侯朝宗魏叔子汪鈍翁

侯方域，字朝宗，河南商丘人。生明萬曆四十六年（一六一八）。父祖皆爲顯宦，先生以貴介公子負異才，豪邁不羈，有聲士林。其文馳騁縱橫，務盡其才。著有壯悔堂文集、四憶堂詩集。順治十一年卒（一六五四），年僅三十有七。

魏禧，字冰叔，世號叔子，江西寧都人。生明天啓四年（一六二四）。明亡，先生隱居教授。與長兄伯子、弟季子及彭士望、林時益等共居翠微峯，朝夕講貫，肆力古文辭。喜讀史，尤好左氏傳及蘇洵。其爲文主識議，凌厲雄傑，遇忠孝節烈事，則益感慨，羣書淋漓。年四十，乃出遊。涉江踰淮，至吳越，思益交天下奇士。康熙十七年，徵舉博學鴻儒，以疾辭。後二年（一六八〇），赴揚州故人約，卒於客次。年五十七。著有文集二十二卷，詩八卷，目錄三卷，左傳經世十卷。兄祥，字善伯，世號伯子，更名際瑞。所著有文集十卷，雜俎五卷。弟禮，字和公。所著有詩文集十六卷。世稱寧都三魏。

汪琬，字茗文，號鈍翁，江蘇長洲人。與魏禧同年生，後禧十年歿。順治中進士，歷官皆有政績。舉康熙十七年博學鴻儒，與修明史。公退，無時不致力於古文，頗有造詣。而性狷急，動見人過。又好詆訶，見文章必摘其瑕疵，故恆不滿人，亦極不滿於人。著有堯峯文集五十卷。

侯魏在清初最爲文學之士，聲名藉甚。究其實，侯則自名其集曰壯悔，將刻集，集中文字未脫稿者一夕補綴成之；享年又不及四十，使至五六十，其可悔之處安可計耶？魏氏文章其同時朋輩已有未享上壽，文未潔淨，且多諛崇酬應之作，以爲可惜者。紀曉嵐有言：「古文一派，自明代膚濫於七子，纖佻於三袁，至啓禎而極敝。國初風氣還淳，一時學者始復講唐宋以來之矩矱，而琬與魏禧、侯方域稱爲最工。然禧才雜縱橫，未歸於純粹；方域體兼華藻，稍涉於浮誇；惟琬學術既深，軌轍復正，其言大抵原本六經，與二家迥別。其氣體浩瀚，疏通暢達，頗近南宋諸家，蹊逕亦略不同。應陵、南豐固未易言，要之，接跡歸唐，無愧色也。」此亦未爲的當之論。若以三家之文，較之亭林、梨洲、船山，無論見解不同，即文筆亦有間矣。吾故曰：文學必須先有根據之學也。

附論應酬文之弊病

魏氏之文，論者既有諛墓太多之誚。予則以爲此弊相沿久矣。自唐以來，文學之士專好刻集。集中之文，傳記墓銘，居十四五。凡人一有文名，志在成集，當世富貴者，必攀援請託，以撰其先世之傳誌。意在假此人之集，傳之無窮。無論所載是否真實，但世間集部則愈多而愈濫矣。不獨事不足傳，目累其文亦不足傳。洛陽伽藍記載趙逸之言曰：「一生時中庸之人爾，及其死也，碑文墓誌莫不窮天地之大德，盡生民之能事，爲君共堯舜連衡，爲臣與伊臯等跡。牧民之官，浮虎慕其清塵。執法之吏，埋輪謝其梗直。」所謂生爲盜跖，死爲夷齊，妄言傷正，華辭損實，在後魏已有此弊，在唐後尤爲通病。噫！安得使文學之士絕筆不爲，以保其文格人品耶？

### 述錢牧齋

黃顧諸先生既懲明季士習之空疏，侯魏復懲明季文學之猥靡，故一救之以切實，一救之以雄放。此予緒論中所謂反響者也。然當時尙有特出者一人，則錢牧齋是已。牧齋名謙益，字受之，號牧齋，晚又自號蒙叟，江蘇常熟人。生明萬曆十年（一五八二）。登萬曆三十八年進士第。天啓間，以東林黨人被擯。崇禎初，起官至侍郎，與溫體仁周延儒互爭閣臣，落職里居。甲申之變，赴南京與諸大臣議

立君，屬意潞王常淂。馬士英等既擁戴福王由崧，閣黨阮大鍼又用事，牧齋媚之，上疏頌士英功，又爲大鍼訟冤，因任爲禮部尙書。然終爲馬阮所軋。清師渡江，牧齋迎降，仕新朝，爲禮部侍郎。未幾，去官，退處林泉，建絳雲樓，庋書萬卷，以著述自遣。康熙三年（一六六四）卒，年八十三。

牧齋天才卓越，學力充實。詩文雄深哀豔，無奇不備；儕輩又居國初諸士先，奉爲一代正宗，當之實無愧色。徒以晚節猖披，貽譏士林；且乾隆帝列之貳臣傳中，所著初學有學二集，令行禁燬，流傳既少，知者遂寡。彼嘗從憨山大師德清遊，輯有內典文藏一書，凡歷代關於釋教之文，分類輯入，既有總序，每類前後有小序。（此書久佚，所存者南京圖書館有殘冊數卷，余得其殘目一冊，而南京圖書館則不知其爲牧齋所輯也。）晚年又著楞嚴蒙鈔，精參內典，於焉可見。然牧齋之爲人，趨功名，富嗜欲，決非佛徒，所得者獨其文法耳。文字得釋典之髓，故能別開生面，獨樹一幟也。（按中國文學六朝別有氣象，亦因佛教大昌之故，詳結論中。）後之學者，皈佛未必能文，工文半好闢佛，不獨佛法難傳，卽內典文字之法，亦乏傳人，此牧齋之後，所以竟成絕調也。清初有文名而入貳臣傳者，牧齋而外，周亮工、樸園、吳偉業、梅村，其詩文皆傳於世，未若牧齋受厄之酷也。然牧齋以一書生，其詩文所述亦無

政治上重要關係，專制帝王之力毅然禁之，而仍未絕跡，且歷久而彌光，此非文學上有極大之價值，能如是耶？

### 述清初有關於文學二大事

清初文學，既如上述。當時諸先哲提倡於下，功固偉矣，然尚有二大事與文學至有關連者：則開博學鴻詞科編四庫全書是也。康熙十七年，詔開博學鴻詞科，其意在網羅名宿。卒之清廷所欲羅而致之者，雖未預試，而預試者亦半爲博聞廣記之士。所得之士，若朱彝尊、汪琬、陳維崧、潘耒等皆名重海內，學傳後世。蓋諸人者亦皆好古取求，博聞強記，如顧黃諸先生所不逮者，偏工文學耳。清廷既以鴻博爲取士之鉅典，而又搜剔山澤，招徠草莽，以虛名籠之，以清職處之。當時布衣讀書之士有聲譽者，亦皆賜官，召直南書房。如康熙四十一年冬，南巡，駐涿州，召直隸巡撫李光地詢草澤遺才，光地以何焯薦，詔賜舉人，復賜進士，改翰林院庶吉士，命侍讀皇八子，兼武英殿纂修官，卽其例也。——何焯字杞瞻，江蘇長洲人，世稱義門先生者也。蓋其時取士之法，雖仍爲科舉制藝，而待實學之士則破格錄用。此所以遺老守節之士恥食周粟，不入網羅；而其餘才俊之士，則幾於人盡登庸，入彀中而遺

珠也。有才名而冤抑不遇者，獨一吳兆騫耳。（兆騫字漢槎，江蘇吳江人。順治中領鄉薦，以科場事，中蜚語被斥，徙尚陽堡，在戍所歷二十餘年，納蘭性德、徐乾學捐金贖之，得歸。著有秋笈集。）由此觀之，鴻博之開，雖爲人主羅致人才之術，然其表彰實學之士，以救當世空疏之習，則功亦不小。浸淫至於乾隆，亡國之恨日漸消磨，遺老零落盡矣；又當人主好尚文藻之士，雖亦兩開是科，然相尙以詩賦記誦之學，其末流亦無殊於制藝，此鴻博之所以廢也。

乾隆三十八年，詔各省採進書籍，修四庫全書，乾隆四十七年告成。四庫仿自永樂大典，大典仿自太平御覽，同爲帝王消磨才智之一法。然余獨斷爲有關清初文學極鉅者，蓋御覽剪裁古籍，分類編輯，實無意義。大典分韻輯書，書雖未經割裂，然但有保存古書之功，並無宗旨可言。四庫去取之間，實未盡當。（其弊如改削原書，割裂卷數，非清者屏棄無遺，不一而足。）然在當時，則固所謂表彰儒術，排斥異端者也。且搜羅海內書籍，進書之家多至百種以上者，皆有獎勵，則藏書者知勉矣。輯及當代學者述作，則著書者知奮矣。雖當時總其成者爲詞章記誦之紀昀（曉嵐任總纂官），然總閱官中則有朱珪，分校官中則有戴震、王念孫，纂修官中則有姚鼐、翁方綱、朱筠等，皆碩學博通之士，故全書

部署，秩然有序，一部書目提要，赫然爲目錄學之鉅製也。清既假修書之名，以羅致人才，復因所輯之書，以鼓勵學者，故曰四庫全書與博學鴻詞兩事，實清初文學有關之事也。自開國至於嘉慶，文學不至衰茫，蓋以此耳。

### 三 乾隆文學概述

述袁枚 述桐城派 述汪中

乾隆所尙與康熙不同。康熙音韻數理各究其妙，謂爲受明末遺老之薰陶也可；謂爲開清代學術之先路也亦可。乾隆則專尙華辭，獨喜賦頌。且去清初漸遠，文習漸以華麗；使非鴻博之科猶存影響，四庫之輯可振學風，恐清代之文學至此已搖落無存矣。是時應運而起者，則有袁子才，胡稚威，洪稚存等。而子才尤著。子才名枚，一號簡齋，浙江錢塘人。生康熙五十五年（一七一六）。乾隆四年進士，官館爲江寧知縣。年四十，卽致仕，築隨園於南京小倉山麓，賦詩吟詠，逍遙山水，主東南壇坫者且五十年。當世識與不識，皆稱爲才子。其爲文也，駢散兼工，以驚才側艷之筆，運流轉橫逸之思，用輕清俊快之語，化陳腐習見之典，獨自成家，一代文豪也。爾時講議，或因其行止不檢，放浪爲懷，以人品之故，議及文品，豈篤論哉！著有小倉山房詩文集七十餘卷，尺牘詩話以及說部之屬都三十餘種。嘉慶

二年卒（一七九七）年八十二。

稚威名天游，浙江山陰人。康熙三十五年（一六九六）少有異才，書無所不窺。工詩文，尤擅駢麗，沈博奧衍，方駕燕許。乾隆元年，舉博學鴻詞科，名冠一時。袁子才與同赴試，亦甚折服曰：「吾於稚威則師之矣。」嘗言：「古今人皆死，惟能文章者不死。雖有聖賢豪傑，瑰意琦行，離文章則其人皆死。」誠快論也。著有石笥山房集。

洪亮吉字稚存，一字君直，江蘇陽湖人。生乾隆十一年（一七四六）。舉乾隆五十五年進士。著有春秋左傳詁二十卷，公羊穀梁古義二卷，六書轉注錄八卷，漢魏音四卷，比雅十二卷，弟子職箋識一卷，傳經表二卷，通經表二卷，四史發伏十二卷，三國疆域志二卷，東晉疆域志四卷，十六國疆域志十六卷，西夏國志十六卷，乾隆府廳州縣圖志五十卷，卷施閣詩文甲乙集三十二卷，更生齋詩文甲乙集十六卷，詞二卷，外家紀聞二卷，伊犁日記二卷，天山客話二卷，北江詩話六卷，曉讀書齋雜錄八卷。嘉慶十四年（一八〇九）卒。年六十四。

北江之學，博通淹貫，訓詁音韻皆極有根柢。其於輿地之學，尤爲深邃，方之次風先生（天台齊

召南。著有水道提綱三十卷。實無多讓。而其所爲文章，亦尙駢麗，與稚威子才並驅中原，則當時風尙如此，雖賢者不能不就其範故也。

文體文習既以次漸變，於是有薄之而不爲，有正之思復古，有矯之以立異者，派別因之而分矣。所謂薄之而不爲者，戴震、段玉裁、王念孫諸人也。震字東原，安徽休寧人。生雍正元年（一七二三）。其爲學由聲音文字以求訓詁，由訓詁以尋義理。謂：「義理不可空憑胸臆，必求之於古經。求之古經而遺文垂絕，今古懸隔，必求之古訓。古訓明則古經明。古經明則義理明矣。義理非他，存乎典章制度者也。彼歧訓詁義理而二之，是訓詁非以明義理，而義理不寓典章制度，勢必流入於異學曲說而不自知也。」又以宋儒言性言理，言道言才，言誠言明，言權言仁義禮智，言智仁勇，皆非六經孔孟之言，而以異學之言糅之。故就孟子字義開示，使人知人欲淨盡，天理流行之語病，於是作孟子字義疏證及原善論性諸篇，以明古聖賢以體民之情，遂民之欲爲得理之義。其生平所治之學，凡分三類：曰小學，曰歷算，曰典章制度，而其歸則爲哲學。所著述者亦不外此數者。其輿地之學，超越前賢（如水經注、直隸河渠書等）猶其餘事也。卒乾隆四十二年（一七七七）年五十五。玉裁字若膺，江蘇金

增人。生雍正十三年（一七三五）。乾隆時至京師，見東原，師事之。而專從事於小學，成說文解字注三十卷。王念孫序之曰：『千七百年無此作矣。』及其卒也（一八一五），又曰：『若磨死，天下遂無讀書人矣。』誠哉是言。段氏不獨叔重之功臣，實說文開山之鼻祖也。念孫字懷祖，江蘇高郵人。生乾隆九年（一七四四）。父安國，子引之，三代皆以學術名海內。懷祖幼受業於東原，故其學一宗戴氏，說無依據，不敢妄斷。其校勘之精，記誦之博，立言之確，說義之明，當代推爲經師，後世無可訾議，人以爲惟元和惠氏祖孫父子可以並駕耳。（惠周惕子士奇孫棟）此一師二弟所成就之學，歷劫不磨。而對於並世所謂文學者，殆若無視。求學問有紹先啓後之功，決不爭文章虛名於一日。此予所謂薄之而不爲者也。

乾隆之際，文旣日麗，麗則必靡，靡則救之以質，於是桐城派古文辭乃應運而起。桐城初祖推方望溪氏。望溪名苞，字靈皋，安徽桐城人。生康熙七年（一六六八）。卒乾隆十四年（一七四九）。康熙間，舉進士，歷官至侍郎。當時以理學家自命。其爲文由歸震川以上接歐陽永叔韓退之。雖雅潔清秀，而少光燄氣魄。著有望溪集八卷。望溪一傳而爲劉大櫟。大櫟字才甫，亦桐城人。生康熙三十七年。

（一六九八）望溪之文以義法爲重，才甫之文則並古人神氣音節皆欲摹擬之，而實則仍甚怯弱。著有海峯集八卷。才甫一傳而爲姚鼐、吳定、鼐字姬傳，亦桐城人。生雍正九年（一七三一）。世父範，與大櫟友善，命鼐受文法於大櫟。然鼐又傳經學於家庭之間，故其爲文，理深於劉氏。其論學之言曰：「說經古今自有真是非，勿徇時人之好尚。如近年海內諸賢所持漢學，與明以來講章諸君，何以大相過哉？夫漢儒之學，非不佳也；而今之爲漢學，乃不佳，偏徇而不論理之是非，瑣碎而不識事之大小，嘵嘵聒聒，道聽塗說，正使人厭惡耳。且讀書者欲有益於身心也，程子以記史書爲玩物喪志，若今之爲漢學者，以搜殘舉碎，人所少見者爲功，其爲玩物，不彌甚耶？」又與人書曰：「秦漢以來，諸儒說經者，合與離固非一途。程朱出，多得古人精深之旨；而其生平修己立德，又實足踐行其言，爲後世所嚮慕。故元明皆以其學取士，自利祿之途開，爲其學者，以爲進趨富貴而已，其言有失，奉而不敢稍違；其得亦不知所以爲得，斯固數百年來之陋習。今世學者乃思一切矯之，專宗漢學，以攻駁程朱爲能，倡於一二專己好名之人，而相率而效者，遂大爲學術之害。」蓋是時漢學之習，既成風尚，鉅釘破碎以爲古，支離斷爛以爲博，其弊不可以藥。袁枚、紀昀等又以無實之學，輕薄之言，詆訕宋儒。於是顧黃諸

先生之緒將絕，而躬行實踐如李二曲、孫夏峯先生輩尤不多見，故姬傳議論，欲以實在之宋學救其衰也。至專治文學之書，則所編古文辭類纂已盡言之。自來言古文法則者，殆莫詳於姬傳。姬傳既衍方劉之緒，而又年登耄耋（卒嘉慶二十年——一八一五——年八十五），久主東南各大書院講席，相從問業者甚多。歷城周永年書昌復爲之語曰：『天下文章其在桐城乎？』士大夫復相與數其體，而於是桐城派遂成立焉。翁所著有九經說十九卷，三傳補注三卷，老子章義一卷，莊子章義十卷，惜抱軒集十六卷，後集十二卷，詩集十卷，書錄四卷，法帖題跋一卷，筆記十卷。治古文於舉世不爲之時，此予所謂有正之思復古者也。

當是時文學之中特出者無過於汪中。中字容甫，江蘇江都人。生乾隆九年（一七四四）。卒乾隆五十九年（一七九四）。其治學宗戴東原，而尤善爲文。文之旨歸，既不喜浮麗之習，更不入桐城之派，堅卓典瞻，下無唐宋。著有述學內外篇。若廣陵對，若漢上琴臺銘，皆近世所無之絕作也。此予所謂有矯之以立異者也。自此以降，學日以頽，文日以敝，蓋盛極將衰矣。

### 清初至乾隆各家略述

自清初以及乾隆，以上所述，乃其大者。其他碩學能文之士，尙難勝數，今略敘之於次，以聰明才辨爭勝，欲以一人之智壓服一世者，蕭山毛奇齡大可也。生明天啓三年（一六二二）。卒康熙五十五年（一七一六）。大可少爲詩文，聲譽甚著。自舉鴻博入京，時方盛言經學，乃亦驚而治經。而性好勝，往往騁其天才，矯立異說，以炫其能；駁難他人，以快其意。惟濟之以縱橫博辨，傲睨一世之文，故亦恆有獨到之處。觀其所著經說，達五十種；辨子貢詩傳申培詩說（二書皆明嘉靖間豐坊僞作）。而成詩傳詩說駁議五卷，辨河圖洛書之僞，而成河圖洛書原舛編、太極圖說遺議，此當辨者也。閻若璩著古文尙書疏證，遂作古文尙書冤詞以反之，此不當辨者也。他如上詆宋儒，攻訐顧炎武、胡渭，皆好勝之心蔽之也。其後全祖望作蕭山毛氏糾謬以正其非，嘗謂：『大可之才，要非流輩所易及，使其平心易氣以立言，其足以羽翼儒苑無疑。』蓋公論也。同時合肥李天馥（字湘北，順治進士，歷官至武英殿大學士）稱：『大可有一不可及者三：不挾書冊而下筆有千萬卷，一也；少不避人，中年在道路得怔忡疾，遇疾發，求文者在門，捫腹四應，頃刻付去無誤，二也；讀書務精覈，羣經諸子及諸項屑事皆極其根柢，而貫其枝葉，偶一論及，輒能使漢宋儒者拄口不敢辨，三也。』亦實情也。所著文集多至二百

### 三十四卷。

積學勤苦，至老彌篤，則有若慈谿姜宸英、西溟。生明崇禎元年（一六二八）。卒康熙三十八年（一六九九）。西溟以氣節文章名當時。魏叔子嘗謂：『朝宗肆而不醇，堯峯醇而不肆，先生在醇肆之間。』時趨其論。詩亦著名。著有滿園未定稿八卷，葦間詩集十卷。

貫串事理，成一家言，則有若達州唐大陶、歸萬。生明崇禎三年（一六三〇）。卒康熙四十三年（一七〇四）。歸萬爲學，自身心性命，以達事務條理，莫不原原本本，確然有得。著書九十七篇，名曰潛書。體例類周秦諸子。文章亦精切不泛。魏叔子初見其書，大驚曰：『此周秦之書也，今猶有此人乎？』潘次耕爲序，有云：『斯編遠追古人，貌離而神合。不名潛書，直名唐子可矣。』梁啓超則謂：『大約王符、潛夫論，苟悅中鑒，徐幹中論之亞，在古今著作之林，有相當位置。』可以識其涯略矣。

淡於功名，篤志文學，而爲選文先導者，則有若宜興儲欣同人。生明崇禎四年（一六三一）。卒康熙四十五年（一七〇六）。欣之文謹潔明暢，體格與桐城爲近。而選文自明茅坤以來，皆意在制義，求合時尚，去法日遠，文習日陋。欣之唐宋十家選文五十一卷出，而選政一變；上革明季之陋，下開

古文辭類纂駢體文鈔之先。儲氏文學雖無大績可載，而此事則實爲選文上一大變遷，不可不紀者也。嘗謂自漢以降，集部日多，既難徧誦，而作者一生得意之文，可以傳後，可以取法，殆亦無幾。與其泛覽，不如選讀。然選文全恃選者之見地學力，苟一不慎，流弊無窮。蓋讀專集雖費時日，尚可深明作者之義理寄託。讀選文而選者不當，則作者之身分反因選而失卻矣。試舉一例：選文之祖爲昭明，究尙辭華，不喜質直，故讀文選者，對於自戰國至六朝之文學，其感想皆覺莊重典麗，而無質樸恬逸，奇橫高邁之趣。其實楚文則屈原，宋玉之外有莊子在；而漢以後若諸葛忠武之出師表，王羲之之蘭亭集序，陶淵明之歸去來辭，閒情賦，桃花源記，皆千古不磨之作，後世文士所欲急於一讀者也。文選不之選，則選文者昭明太子故也。自梁之後，此風竟乏嗣響。唐人所選詩集爲多，至宋而有呂祖謙之古文關鍵，真德秀之文章正宗，謝疊山之文章軌範。文章軌範之評點，已專爲當時應試人說法，開明代之陋習。茅坤八家文選，雖以文章正宗爲根據，而專論文法，且評論亦不精確。獨儲氏此書雖不及後來之詳盡，而規模粗具，實選文家之圭臬也。選文至重，故特詳論之如此。

得通儒之傳，以博洽宏肆著稱者，則有若吳江藩末次耕，生順治三年（一六四六）。卒康熙四

十七年（一七〇八）次耕從亭林學最久。復遊於徐枋、戴笠（均明末遺民）之門。故其學貫穿淹洽，無所不通，發爲文章，精博無涯矣。著有遂初堂詩文集三十九卷。餘著尙多。

好爲妙遠不測之文，以開後來方姚一派者，則有若桐城 戴名世、楊夫。生順治十年（一六五三）卒康熙五十二年（一七一三）。楊夫雅負史才，有志自撰明史，而未有成。所著南山集嘗采明末遺事人文，致遭大忌，卒召文字之禍。第觀其文，生動清妙，高出方劉，桐城文章實宜奉爲開山之祖。乃姬傳纂述，自才甫靈皋以上接熙甫，而未及楊夫，或者有所顧忌而不敢爲歟？

以良史之才，擅文章之能事者，則有若鄞縣 全祖望、紹衣。生康熙四十四年（一七〇五）卒乾隆二十年（一七五五）。始黃黎洲既以學術倡導於浙東，及門弟子甚衆，而四明萬斯大、斯同兄弟實紹其緒。斯大字充宗，傳黎洲之經學；斯同字季野，傳黎洲之史學。紹衣則又衍季野之緒者也。所著鮚埼亭集五十卷，其中所載傳記墓志，大率皆明末遺民，仗節死義，與夫抗志高蹈者。又最善論述學術流派，描寫學者個性。蓋志在表揚正義人道，不徒爲鄉邦文獻之徵也。性極狷介而方嚴，對於僞學者如錢謙益、李光地輩，則又直揭其假面具，筆削心誅，凜然古之直史哉！其後會稽章學誠、實齋一生

乾隆三年（一七三八）。卒嘉慶六年（一八〇一）。『嘗著浙東學術篇，論列梨洲二萬學風與浙西不同之點，在能究心史學；有曰：『黎洲黃氏出蕺山劉氏之門，而開萬氏兄弟經史之學，以至全氏祖望輩尙存其意。……世推顧亭林氏爲開國儒宗，然自是浙西之學。不知同時有梨洲出於浙東，雖與顧氏並峙，而上宗王劉，下開二萬，較之顧氏，源遠而流長矣。……浙東貴專家，浙西尙博雅，各因其習而習。……浙東之學，言性命者必究於史，此其所以卓也。……朱陸異同所以紛綸，則惟騰空言而不切於人事耳。知史學之本於春秋，知春秋之將以經世，則知性命無可空言，而講學者必有事事不特無門戶可持，亦且無以持門戶矣。』觀此則相遞之跡，釐然可尋焉。實齋精究文史，辨章學術，其學風絕似紹衣。所著文史通義八卷，校離通義三卷，於歷史哲學獨標心悟，雖文字不甚高古，然固著作之文也。

駉儷之文雖盛於乾隆，然清初不乏能者，而宜與陳維崧其年最著。生明天啓五年（一六二五）。卒康熙二十一年（一六八二）。幼承家學，（其父貞慧字定生，明季與侯朝宗及桐城方密之，如皋冒辟疆稱四公子。）擅詩文。時江南大興文會，其年人座，索筆賦詩數十韻立就。時或用六朝俳體作

記序，頃刻千言，鉅麗無比。嘗曰：『吾胸中尚有駢體文千篇，特未暇寫出耳。』後舉康熙己未博學鴻詞科。汪荅文稱之曰：『唐以前，不敢知。自開寶後，七百年無此等作矣。』所著有湖海樓集五十卷。乾隆間，袁洪諸家外，尚有曲阜孔廣森摛約。『生乾隆十七年（一七五二）。卒乾隆五十一年（一七八六）。』少受經於戴東原，專春秋公羊傳，著春秋公羊通義十一卷，以紹漢儒師法。餘著尚多。其儀鄭堂駢體文三卷，雍容華貴，汪容甫讀之，歎爲絕手。然特其餘緒耳。

## 四 嘉慶文學概述

述阮元焦循 述陽湖派

嘉慶之際，遺老凋零盡矣，文學一途，日見衰落；而遺風未息，獨有可述。蓋當時朝廷雖乏宏獎之舉，疆吏尙有羅愛之美。自乾隆間秋帆畢沅（生雍正八年一七三〇）卒嘉慶二年一七九七江蘇鎮洋人歷官至湖廣總督。愛才養士，傾動一世之後，至嘉慶而芸臺阮元（生乾隆二十九年一七六四）卒道光二十九年一八四九繼之。且較畢氏尤爲切實。專延樸學之士，不以浮文相尙。幕府之中，東南名宿盡在其間，不獨輶軒一錄足以表彰人倫，鼓勵士氣也。其十三經校勘記尤爲有功於經術。學經室文集輔翼經傳之作亦不在少數。阮氏在儀徵以武世家，而芸臺特起，獨能以文學撐東南之殘局。與之齊名，且屬至戚，相依幕中，切磋商略者，則有甘泉焦循，理堂生乾隆二十八年（一七六三）卒嘉慶二十五年（一八二〇）。焦氏之學，最精於易，著有易學三書，易餘籀錄，易話，注易日記，

易廣記等書。其他詩、書、禮、春秋、論、孟、小學皆有著述。而數理亦復研究至深。文有雕菰樓集二十四卷，詞三卷，詩話一卷。彼以一人之力，享五十八年之壽，倦遊之後，村居謝客，絕迹塵市者十餘年，其所成就乃能如此。以視芸臺取精用宏，間藉賓客之力，其難易蓋不可同年而語矣。理堂爲文，最喜柳子厚，習之不倦，以爲唐宋以來一人而已。然讀其遺文，堅卓典雅，頗近汪容甫，其實蓋得力於邨先生者爲多也。有清一代，廣陵文學，吾必以汪氏、焦氏爲其首曄矣。

乾隆之間，治古文者，桐城諸子而外，尚有陽湖惲子居，武進張皋文。子居名敬，生乾隆二十二年（一七五七）。卒嘉慶二十二年（一八一七）。皋文名惠言，生乾隆二十六年（一七六一）。卒嘉慶七年（一八〇二）。乾隆之末，子居以舉人充官學教習，居京師，與皋文商榷經義，研治古文。未幾，出宰浙贛，銳意撫字。比皋文歿於京師時，子居亦以忤上官罷歸，聞之慨然曰：「古文自元明以來，漸失其傳。吾向不多作者，以有皋文在也。今皋文死，吾當併力爲之。」於是益務爲文以自壯。著有大雲山房文稿八卷。其論事得力於韓非、李斯，與蘇明允相上下，近法家言。其敘事似班孟堅、陳承祚。而先生自謂：「吾文皆自司馬子長出，子長以下，無北面者。」皋文少爲詞賦，嘗擬司馬相如、揚雄。及壯，爲古

文，效法韓愈歐陽修，而氣體與修爲近。著有茗柯文編 卷。兩家之文，風格不同。且皋文深於經，尤精虞氏易，粹然儒者；而子居之學則非漢非宋，不主故常，於陰陽名法儒墨道德之書既無所不讀，又兼通禪理；其學術又不一途。人以其同爲常州人也，則稱之曰陽湖派，以示別於桐城派。其實桐城陽湖皆出海峯（陽湖錢伯垌受業才甫傳授鄉人）皆法唐宋。惟桐城太拘曲，而陽湖較開展，似勝一籌耳。

論輯文選文

嘉慶一朝，最有功於中國文學者，莫過於嘉慶十三年詔開全唐文館。一代之文，有專集者，數傳之後，尙易湮沒；無專集者，雖其著作極關重要，於何依託以傳於後？倘非全輯，明珠良玉見棄於淵中，岩下者多矣。然自古以來，全代之文，皆以爲繁重而不敢輯。以康熙全盛之時，右文之主，僅輯全唐詩九百卷，全金詩七十四卷，文則尙未暇顧問也。前乎此者，明梅鼎祚爲最有功。若西漢文紀二十四卷，東漢文紀三十三卷，三國文紀二十四卷，（魏十八卷，蜀二卷，吳四卷。）西晉文紀二十卷，東晉文紀若干卷，（此書久佚，故莫詳其卷數），宋文紀十八卷，南齊文紀十卷，梁文紀十四卷，陳文紀八卷，北齊文紀三卷，後周文紀八卷，隋文紀八卷，皇朝文紀十三卷，釋文紀四十五卷，雖大半依據正史，而以

一人之力所輯之多如此，以視張溥之編漢魏六朝一百家集一百十八卷，其難易蓋不同矣。然梅氏所輯者，既皆據經見之書，未嘗潛搜冥討，則一代之文僅得大概，尙未全備。自黃梨洲有明文海之輯，（四庫全書作四百八十二卷。其實有六百卷。蓋四庫因有忌諱之文，刪節成四百餘卷也。）所收較廣，而論者或議其體例糅雜，未盡精密；其弟子閻若璩亦以爲出其子主一之手。（見潛邱劄記）則亦未爲全璧也。全唐文之輯也，一依全唐詩之例。凡屬唐文，盡皆羅列，剔岩搜谷，惟恐或遺。存而不斷，最爲得體。以帝王之力成此巨編，前無古人矣。庸詎知當時尙有一草茅儒士，力能自全上古輯至六朝，若浙江烏程嚴可均其人耶？嚴氏全書七百六十四卷：全上古三代文十六卷，全秦文一卷，全漢文六十三卷，全後漢文一百六卷，全三國文七十五卷，全晉文一百六十七卷，全宋文六十四卷，全齊文二十六卷，全梁文七十四卷，全陳文十八卷，全後魏文六十卷，全北齊文十卷，全後周文二十四卷，全隋文三十六卷，先唐文一卷。（尙有韻編全文姓氏五卷未刊。）當嘉慶開館編輯唐文之日，嚴氏不預，慨然以成此書。書中作者各附小傳，字句異同，無不校訂，一手寫定，不假人力。唐以前文章咸萃於此。噫！盛矣！余嘗以爲選文不如輯之爲得。蓋選文之權不在撰文之人，而在選者。選者各有見地，各有

宗旨，往往不能盡善。譬如戲鴻堂帖爲香光董氏所鈎勒，不論晉唐名家手跡，尺牘，遂皆各具董意，不若輯文任後之閱者自擇，較爲合宜。此嚴氏之力不可及，而嚴氏之功爲尤不可沒也。可均字景文，生乾隆二十七年（一七六三），卒道光二十三年（一八四三）。輯文之外，尚有說文長編之作。又訂正石經，所著有鐵橋漫稿十三卷。

同時江蘇陽湖李兆洛申耆生，乾隆三十四年（一七六九），卒道光二十一年（一八四一）。於宋學漢學之外，復有唐宋文漢魏文之論。以爲『自秦迄隋，其體遞變，而文無異名。自唐以來，始有古文之目，而目六朝之文爲駢體。爲其學者亦自以爲與古文殊路。夫氣有厚薄，天爲之也。學有純駁，人爲之也。體格有變遷，人與天參焉者也。義理無殊途，天與人合焉者也。得其厚薄純駁之故，則於其體格之變，可以知世焉。於其義理之無殊，可以知文焉。文之體至六代而其變極矣，沿其流而溯之，以至乎其源，則其所出者一也。』申耆本此旨輯駢體文鈔七十一卷。蓋病當世之爲文者知宗唐宋，而不知宗兩漢故也。夫文之起源，不分駢散，文之歸宿，詎有古今。昌黎變六代之習，始有古文之名；後世若復有變昌黎之習返之六朝者，將名爲今文乎？古文乎？今文，則固宗六朝而在昌黎之前者也。古文，

則昌黎一派又以古文之名自居矣。噫！此余所以有實開門戶紛爭之弊之說也。清至嘉慶，桐城、陽湖二派古文之名既成，而繼之者文體日以萎靡。申耆之爲此說，輯此書，蓋不徒辨文學之本源，實以鍼當時之膏肓，起累代之廢疾也。當舉世風靡之日，既不隨之以靡，復不以乾隆時駢儷之習爲然，毅然出此，洵有識矣。所著有養一齋集二十卷。

#### G 述王仲瞿

當是時有異軍突起者一人，則秀水 王壘也。壘字仲瞿，一名良士。生乾隆二十五年（一七八六）。卒 嘉慶二十二年（一八一七）。學博而肆。文奇以僻。通兵家言。習奇遁術。善弓矢，上馬如飛。嘉慶教匪之役起，薦之者獲罪被放。仲瞿亦擯居秋涇之上，慷慨悲歌，鬱鬱以終。據其虎邱山 夢室志云：所著有詩文集若干卷，西夏書若干卷，讀竺貫華若干卷，洪範五事官人書若干卷，歷代神史若干卷，居今稽古之錄若干卷，隨園金石考若干卷，繡帶集若干卷，魚龍變傳奇 遼蕭皇后十香傳奇若干卷，經解三卷，史論三卷，傳家六法一卷，歸農樂傳奇九齣，玉鈞洞天傳奇四十八齣，萬花緣傳奇四十八齣。獨其詩文集八卷爲錢梅谿 陳雲伯兩先生曾序而刊之，卽世所傳烟霞萬古樓集是也。其他諸稿皆散佚。

不存。仲瞿詩文，或曰得力於秦會之。案秦氏文集，各藏書家目錄未見。獨宋尤氏遂初堂書目有奏議集一種。以秦氏少時之所爲斷之，亦恃才不羈之士，其爲文必有可觀。豈仲瞿先生獨得枕中鴻寶，故文筆之奇特如此耶？要之王氏之文可謂凌烟霞而直上，曠萬古而無儔。雖非正軌，大異凡響等身著作，僅傳詩文，不獨人嫉其奇，天亦憎其才矣。文學之道，不外三途，曰才，曰學，曰識。學者人力，才者天秉，識者介於天人之間，由學問經驗資秉而成者也。以中人之資，治學不倦，又享大年，雖不學爲文章，其文必傳；此無他，人力既盡，見聞既博，必然之理也。若其下者，所治之學沾沾記誦之間，不辨綱領，不識蹊徑，摹仿以爲法，粉飾以爲工，此無識之故也。至於絕塵而馳，超軼凡馬，一瞬千里，挾雲而飛，不見鷄雀，風斯在下，所非天秉奇才，詎可至耶？自清初以來，若錢牧齋，若袁子才，差可以語此矣。毛大可好以辨勝人，侯朝宗但得縱橫雄肆之氣，尙有間也。仲瞿之文，瑕瑜互見，讀其集者，皆能辨之。至其天才橫逸，不特辨以驚人，不使氣以凌物，使讀其文者自覺望塵莫及，非得天獨厚者能之耶？以天才論，此爲清代之最矣。前乎此者，錢袁二家，尙守繩墨。後乎此者，定盦龔氏，尙嫌膽小也。（近者張公東先生鳴珂慕鄉先哲之爲文，刻意搜輯，僅得黻黼圖一卷，未刻詩十餘冊，曾爲選鈔成卷。後輾轉假人，爲兵燹

所燬。黻黼同皆迴文詩，其書未全，亦未付印。其餘殘稿一卷，制藝三十餘篇，曾爲刊行。公東亦近世文學之士，其爲詩文皆循規矩之中。嘗自署曰王仲瞿私淑弟子，使公東及身受業於烟霞萬古樓中，亦正如毛大可之門而有李恕谷埒其人耳。）

#### 嘉慶時各家略述

嘉慶一朝，爲文不宗漢魏，不法唐宋，本之於訓詁，出之於性情，氣和體醇，藹然仁者之言，則嘉興錢儀吉泰吉昆季也。儀吉字衍石，著有衍石齋記事稿十卷，續稿十卷，刻楮集四卷，旋逸小稿兩卷。泰吉字警石，著有海昌學職、禾人考、海昌備志、甘泉鄉人詩文稿等。二錢之文，蓋儒家之文也。

意思深刻，議論瀾翻，其爲文也，深入顯出，矯捷沉快，其立意也，不落尋常，自闢蹊徑，則涇縣包世臣也。世臣字慎伯，以詞章始，以經濟中，以書法終。著有小倦遊閣文集三十卷，中衢一勺七卷，藝舟雙楫六卷，附錄三卷，管情三義八卷，齊民四術十二卷，說儲三卷。慎伯之文，蓋子家之文也。

## 五 道光文學概述

自清初至於嘉慶，以學術論，漢多宋少；以文學論，桐城一派在學術上根據於漢宋之間，在文字上專宗唐宋。其他則皆漢魏與唐宋互攻並治。而自乾隆之際，駢儷大盛，且開後來宋四六唐四六之爭，此李中書駢體文鈔之選所以爲可貴也。然自清初至嘉慶，雖外有回疆之役，內有教匪之禍，而大局固定，時勢不變，故學者所治，皆謹守國故，斷斷於漢學宋學漢魏唐宋之間。至道光之初，遺風流韻，日以衰歇。道光之季，歐力東漸，鴉片一役，喪師失地，時局變矣，環境易矣。知向所爲漢學宋學者，皆中國固有之學，不足以應世界之變。墨守師說者，固惟舊是保；究心時事者，已慨然思變。然其幾尙微，作者至少。且中西文字既未溝通，遠道傳聞，差非事實。即有所見，亦正皮毛。然自後觀前，則覺其未明世界大勢，以中國舊日之觀念評判時事，未免可笑。自當日論之，實思想變遷之漸，學術轉移之機也。夫文學既以學術爲根據，學術復以思想爲推移，而思想則又受主宰於環境。以何證之？如佛之談極樂

國土也，必以金沙鋪地，天雨香花爲言。所謂金沙，所謂香花，皆根據非極樂國土之人之心理。究竟極樂國土是否以天雨香花，金沙鋪地爲樂，實未敢必，則知思想之不能超越環境者，一定之理也。以刀劍殺人，不如弓箭之及遠。以弓箭殺人，不如槍礮之及遠。以槍礮殺人，不如綠氣礮之烈。以綠氣礮殺人，不如毒瓦斯之烈。使當世爭戰皆用毒瓦斯，而爲文者猶以刀劍爲殺人至烈之兵器，必無之理矣。故曰：文學者隨環境爲變遷者也。此卽予緒論中時代之說也。道光之季，環境漸易矣，此所以有魏源其人也。源字默深，湖南邵陽人。生乾隆五十九年（一七九四）卒咸豐六年（一八五六）。初治宋學，葉開治漢。所著有書古微十二卷，詩古微二十卷，董子春秋發微七卷，望武記十四卷，皆尙承乾嘉諸儒之緒。至海國圖志百卷，及以夷攻夷之論，則時代之書矣。其時賀長齡方輯皇朝經世文編，源復襄助成之。蓋魏氏雖未敢公言漢宋之學不可以應當世之務，而其趨嚮浸沒有非明瞭世界大勢不足以圖存之概矣。故其爲文，不法漢魏，不宗唐宋。務在明暢條達。著有清夜齋集二十卷。其選文亦惟注意於有裨時局之作，不以文法爲歸。使默深生於乾嘉之際，固漢學之信徒。若其不然，遲生六七年，亦戊戌諸君子之儔也。清文至此，蓋將一變矣。

述龔定盦

同時傳漢學者莫若仁和龔自珍。自珍字璣人，號定盦。生乾隆五十七年（一七九二）。卒道光二十一年（一八四一）。定盦爲金壇段玉裁外孫。年十二，親承外祖之教，卽有志於小學訓詁之學。所著有尚書序大義一卷，秦誓答問一卷，尚書馬氏家法一卷，左氏春秋服杜補義一卷，左氏決疣一卷，春秋決事比一卷，西漢君臣傳春秋之義一卷，典客道古錄一卷，奉常道古錄一卷，羽琤山金石墨本記五卷，羽琤山典寶記二卷，鏡苑一卷，漢官拾遺一卷，泉水記一卷，布衣傳一卷，定盦文集三卷，續集四卷，文集補二卷，補編四卷。定盦之爲學，凡訓詁，掌故，輿地，目錄，金石之學，無不精究。定盦之爲文，凡九經七緯諸子百家無不鎔貫。定盦之爲詩，非宋非唐，非漢魏。運縹緲之思，用雄奇之筆，獨往獨來，無可羈絆。當時推爲文雄。然論者以爲桐城之文如泰山主峯，不可褻視；定盦之文如徂徠新甫，相與揖讓，俛仰於百里之間。爲此說者，蓋不能掩定盦之奇，又不甘桐城一派因此而輕，故有此似是而非之論。使桐城之文果爲泰山，則定盦之文正當譬諸華岳，奇峯峭壁，峻險莫攀，豈徂徠新甫所能喻之？非定盦者獨其子龔橙。孝拱之學，亦宗漢，亦有獨到之處。若以文論，則固定盦不肖之子也。又圓明園

一役，孝拱導之，後遂流落海上，鬱悒放浪以死。不獨定盦之文不傳，定盦之嗣亦斬矣。以道光一朝之漢學文章論，舍定盦其誰歸。

### 述桐城派淵源

是時守桐城師法者，莫若梅曾亮，管同二人。曾亮字伯言，江蘇上元人。少好駢儷，後遊姚惜抱之門，始治古文辭。著有柏峴山房文集十六卷，駢文二卷。同字異之，亦上元人。與伯言同學於姚氏，皆稱高第弟子。著有因寄軒文集十六卷。桐城派之文，自望溪至梅管，凡四傳矣。自梅管而後，桐城之派愈衰愈微，浸以不振矣。予以爲自韓昌黎以來，至於梅管，其源可溯，其派至明。今舉其證：昌黎與崔立之書曰：『或出禮部所試詩賦策等以相示，僕以爲可無學而能。聞吏部有以博學宏辭選者，就求其術，或出所試文章，亦禮部之類。』又答寶秀才書曰：『念終無以樹立，遂發憤篤專於文學，學不得其術，凡所辛苦而僅有之者，皆符於空言而不適於實用。』歐陽修與張秀才第二書曰：『尋足下之意，豈非閱世病俗，究明古道，欲援今以復古，而翦剔齊整，凡今之分殺駁冗者歟。』歸有光與潘子美書曰：『科舉之學，驅一世於利祿之中，而成一番人材世道，其敝已極。士方沒首濡溺於其間，無復知有人

生當爲之事。榮辱得喪，纏綿縈繫，不可脫解，以至老死而不悟。」方苞儲執禮文稿序曰：「夫時文者，科舉之士所以牟榮利也。而世之登高科致騰仕者，出其所業，衆或棄擲而不陳。」就以上諸家之言證之，則知諸家之所以治文學而名之曰古文辭者，其起原蓋皆痛惡科舉時文之不可爲，思所以矯而正之，若出一轍也。昌黎之爲文也，其言曰：「或問『文宜何師？』」必謹對曰：「宜師古聖賢。」人曰：「古聖賢人所爲書具存，辭皆不同，宜何師？」必謹對曰：「師其意，不師其辭。」又問曰：「文宜易宜難？」必謹對曰：「無難易，惟其是爾。」又曰：「漢朝人莫不能爲文，獨司馬相如，太史公，劉向，揚雄爲之最。以古聖賢爲法者，雖未必皆是，要若有司馬相如，太史公，劉向，揚雄之徒出，必自於此。」愈之學則見之原道原毀諸文。又其言曰：「周後文弊，百子爲書，各自名家，亂聖人之宗。後生習傳，雜而不真。」又曰：「漢興且百年，尙未知修明先王之道。其後始除挾書之律，稍求亡書，招學士。經雖少得，尙皆殘缺，十亡二三。故學士多老死，新者不見全經，不能盡知先王之事，各以所見爲守，分離乖隔，不合不公，二帝三王羣聖人之道於是大壞。後之學者，無所尋逐，以至於今泯泯也。其禍出於楊墨肆行而莫之禁故也。」又曰：「釋老之害過於楊墨。韓愈之賢不及孟子。孟子不能救之於未亡之前，而韓

愈乃欲全之於已壞之後。『歐陽修與石推官第一書曰：『修聞君子之於學，是而已，不問爲異也好學，莫如揚雄，亦曰如此。』又其第二書曰：『夫釋老，惑者之所爲；雕刻文章，薄者之所爲。』永叔之學，則見之本論。以此證之，歐陽之於韓，蓋亦步亦趨者也。歸震川學歐陽而稍異矣。望溪之言曰：『震川之文，鄉曲應酬者十六七，而又狗請者之意，襲常綴瑣，雖欲大遠於俗言，其道無由。』又曰：『震川之文，於所謂有序者，蓋庶幾矣，而有物者則寡焉。又其辭號雅潔，仍有近俚而傷於繁者。』曾國藩之言曰：『近世綴文之士，頗稱述熙甫，以爲可繼曾南豐王半山。自我觀之，不同日而語矣。或又與方苞氏並舉，抑非其倫也。』而王慶麟之書望溪集後，則曰：『知取道之大原，不專主於爲文；而文詣極者，於唐得韓愈氏，於本朝得方苞氏。』由此觀之，桐城之文，上者宗昌黎，中者法永叔，下者師震川。而昌黎以前之文，則皆匪我思存矣。夫昌黎永叔各家之所謂道，離制度名物而無所依附，徒標其名曰堯舜禹湯文武周孔，而最大之表見，則在闢佛；而桐城宗之。故桐城之根據實在於文，而不在學。文之旨歸，則唐宋而止。蓋韓歐發源之始，僅求免於時文之弊，故所詣如此也。然自近論之，則望溪至於梅管已百餘年。自遠論之，上至昌黎，則相傳之久，殆無其比，而文字之間，形式成矣，派別定矣。文旣成派，後之

學者，就派以求，紆徐以爲妍，曲折以達意。譬如構屋，其間架尺寸皆有一定，戶牖方向絕無異同，易則易矣，空疎之病，日中於人心，摹仿之習，深入於俗見。既有束縛人才之弊，復啓不學無術之途。桐城之末流，乃有張裕釗濂亭文集等文字，吁！可慨已！桐城文學貫穿清代，而按其造詣，講學則不及漢學諸家之實在，言文則並無天趣才調之可言。蓋所依憑者有似乎宋學，而實則韓與歐陽之學，去宋學尙有間也。以文爲招，歷年至久，庸有不敝之理耶？

## 六 咸同文學概述

咸同間之文家，曾氏國藩實爲巨擘。國藩字濬生，湖南湘鄉人。生嘉慶十六年（一八一六）。卒同治十一年（一八七二）。以團練湘勇，削平洪楊，爲中興首功。其文雄偉，遠紹昌黎。嘗欲以戴震、段玉裁、錢大昕、王念孫之訓詁，作楊雄、班固、左傳、國策之文章。自言初解文法，由姚姬傳啓之，故極推崇，至列入聖哲畫像。又序述桐城流派，稱爲文章正軌。彼實本非桐城，而託跡於桐城者。（道光之季，梅伯言在京師，爲文壇老宿，一時依附頗衆，公不爲然，亦可見一端。）其著名作品爲各昭忠祠記及殉難諸碑誌。此蓋以當時諸公，率皆同起行間，患難相共，或死事至慘，或中道殂謝，以身總戎機之人，爲死者寫恨，爲生者勸忠，其哀切矣。其情至矣。夫世間所謂至文者，皆至情所發也。情有不至，文雖工而猶爲下乘。故嘗以爲昌黎、平淮西碑，不若濬生諸昭忠碑記。淮西碑，昌黎自居於作文之士，執筆大書，頌天子宰相之功烈，文至而情不至。昭忠諸記，情餘於文，文稱其情，故爲獨絕。公開府辟屬，垂二十年，

並時羣彥，幾盡羅入戎幕，於戎馬倥偬之際，猶能提倡文學，自是難得。惜乎其未及爲學術上之提倡耳。

並時，與公上下其議論者，則有巴陵吳敏樹、南屏。文字饒有淡遠之神，雅不欲以桐城流派自居，蓋亦矯然能自樹立者。著有杻湖文鈔，幕中能文之士推平江李元度、次青、湘潭王闓運、王秋、桐城吳汝綸、擊甫。次青之文參於全紹衣、魏默深之間，所編有國朝先正事略。王秋則薄唐宋不爲而欲上宗漢魏者也。著湘軍志及湘綺樓集。擊甫則確守其鄉先生義法，而求廣於滌生者也。

爾時治經學者，則有德清俞樾、蔭甫、戴望、子高、儀徵劉毓崧、北山、壽曾、恭甫父子。治詞章者，則有會稽李慈銘、悉伯、趙之謙、搗叔。皆能紹述前修，傳之後世。俞氏著述最富，瑕瑜互見。戴氏享年不永（僅三十七）。李氏、趙氏意氣未平，以中表而互相攻訐，文人之習未除也。

## 七 光宣文學概述

咸同以還，國步維艱。迄於光緒，外患日亟，時局之變，一瞬千里，往昔學說論議，多不切於時勢。學士大夫蒿目時艱，發抒讜論，而文習因之大變；其結果則爲戊戌政變之局。迨庚子禍作，國命旣岌岌不可終日，革命維新之論勃然並興，風發泉湧，而不可復遏。於時雖有張之洞以方面大臣宏獎風流，吳汝綸以大學總教主持文柄，而時代思潮固已趨嚮有自，曾不稍顧及之矣。其結果則爲辛亥革命之局。故知文字鼓吹之力，亦足以左右世變，而光緒之季實乃文體解放之發動期也。

### 述康有爲

戊戌之際，新黨之氣甚銳，而康有爲實爲之魁。有爲字廣廈，又字長素，廣東南海人。少孤。年十八，從朱次琦學。次琦字子襄，亦南海人。其學以理學爲體，以經濟爲用，宗程朱而兼採陸王。有爲則獨好陸王。及遊京師，經香港上海，見西人殖民政治之完整，因思所以致此者必有道德學術以爲之本源。

乃悉購江南製造局及西教會所譯出各書盡讀之。既而講學於長興學舍（萬木草堂），講學於桂林。光緒十五年，以諸生伏闕上書，極陳時局，請及時變法以圖自強。書格不達。甲午敗後，又連合公車千餘人上書申前議，亦不得達。會常熟翁同龢爲德宗師傅，方柄用，薦之。德宗以爲賢，遂有變法維新之舉。僅百日而西太后復垂簾聽政。囚德宗於瀛臺。誅殺譚嗣同，劉光第，楊深秀，楊銳，林旭及有爲弟廣仁等六人，所謂戊戌六君子也。有爲與弟子梁啓超出亡海外。有爲爲人主觀極強。治經宗公羊學。著新學僞經考及大同書等。其思力突過古人，具衝鋒摧堅之大勇，實有不可及者。其文亦流動發王，不拘拘於格調，而自有獨到之處，並非策士干進之儔也。然於文字上改革之功，則不及其弟子梁啓超。

## 述梁啓超

當戊戌維新，康氏既得君甚專，日夜謀所以削太后之黨，建設新政，日不暇給，遑論文字宣傳之力。而啓超則與譚嗣同等各抒其懷抱，著書立說以相鼓吹者也。啓超字卓如，號任公，廣東新會人。年十八，從康有爲遊。乙未七月，有爲創強學會於北京，啓超任書記。明年，汪康年開時務報館於上海，聘

任公專任撰述之役。丁酉，任湖南時務學堂講席。戊戌九月去國。其去國之前所著文字，尙未明瞭世界大勢，且對於清室亦未嘗公然言其過失。去國十餘年，至日本，至美國，至夏威夷，至印度，至澳洲，所見異，所聞異，所撰述亦異矣。其言曰：『當乾隆改元，滿洲入中國殆百年矣，民氣既靜，外侮未來，以高宗純皇帝之才，當此千載一時之遇，我國民最有望者，莫彼時若矣。乃高宗不用其才，爲我中國開文明政體之先河，乃反用其才爲我中國作專制政體之結局。』又曰：『高宗以操縱羣臣，愚弄士民爲生平第一得意事業。六十年中，與文字獄以十數，如胡中藻、汪景祺等之獄，毛舉細故，株連滿廷。』又曰：『開四庫館，以獎勵僞學，手批綱鑑，以詆諆名節。』又曰：『中國未嘗識字，而卽授之以經。未嘗辨訓，未嘗造句，而卽強之爲文。開藝未及一月，而「大學之道，在明明德」之語，騰躍於口，洋溢於耳。夫記者明揭之曰：「大道之學，」今乃驟以施之乳臭小兒，何爲也？「明德」二字，漢儒據爾雅，宋賢據佛典，動數千言，未能懸解。今執負牀之孫而語之，彼烏知其作何狀也。』又曰：『古人之言，卽文也；文卽言也。自後世語言文字分，始有離言而以文稱者。然必言之能達而後文之能成，有固然矣。今之爲教，未授訓詁，未授文法，闐然使代聖賢立言。朝甫聽講，夕卽操觚。又限其格式，詭其題目，連上犯下，』

以鈐之，擒釣渡挽以鑿之。意已盡而敷衍之，非三百字以上勿進也。意未盡而桎梏之，自七百字以外勿庸也。百家之書不必讀，懼其用僻書也。當世之務不必講，懼其觸時事也。」又曰：「中國以文采名於天下，而教文法之書乃無傳焉。意者古人語言與文字合，如儀禮左傳所載辭令皆出口而成文者也。故曰：『不學詩，無以言。』」而傳記亦屢言將命應對之事，蓋學言即學文也。後世兩事既分，而斯義不講。自魏文帝劉彥和始有論文之作，然率爲工文者說法，非爲學文者問津。故後世恒有讀書萬卷而下筆冗沓，龔俗不足觀者。」綜上所述，則知常時之任公對於中國文學之觀念，凡有三點：一，痛恨思想之束縛，而歸罪於乾隆之操縱臣下，愚柔士民。二，痛恨教法之失宜，而歸罪於讀書之不常，制藝之誤人。三，痛恨言文之分離，而歸罪於訓詁之不明，文法之不講。究其所言是否定論，雖任公本人恐亦有思想變遷之日；而所攻之短，所揭之病，則固當時深中肯綮之言也。夫恨束縛思想，則不獨乾隆當攻，漢宋之學亦可以攻矣。望文言合一，則不獨魏文帝劉彥和之論爲不足取，即漢魏唐宋之文亦不足言矣。揭此論以告全國，庸詎有文習不變之理耶？且彼時所著之文，又多爲政治學術宗教教育西方先哲之遺言，遺行。而行文充裕暢達，略無遺義，此其所以風行海內，遂爲清代古文學改革之

功臣也。（所引梁氏之言，皆見清代所著文內。入民國後所著之文不預。）

同時有文名者則爲譚嗣同。嗣同字復生，湖南瀏陽人。父繼洵，官至湖北巡撫。嗣同天稟英偉，博綜羣籍，而又深闡內典。其學術思想大都見於仁學一書，梁任公嘗目爲思想界之彗星。其他所著有寥天一閣文二卷，莽蒼蒼齋詩二卷，遠遶堂集外文一卷，興算學議一卷。未刻者有思緯吉凶臺短書一卷，壯飛樓治事十篇，秋雨年華館叢書四卷，劍經衍葛一卷，印錄一卷。其稿皆任公所藏，今任公已亡，不知譚氏遺稿如何矣。戊戌死國時，年三十三。

### 述嚴復林紓

自雅片戰役以來，國人已知泰西各邦之不可忽視，思進而求其立國之內容。於是譯述西書之業漸興。惟所譯者無非格致書及歷史政法書如泰西新史攬要、萬國公法等而已。他若哲學文學之書則尙少注意及之者。自嚴復、林紓以古文翻譯哲理文藝之作，而其業乃大盛。

嚴復字幾道，福建侯官人。光緒初，官費派往英國學海軍。歸國後，鑑於我國「風氣漸通，士知弁陋爲恥，西學之事，問塗日多。然亦有一二巨子，鼯然謂彼之所精不外象數形下之末，彼之所務不越

功利之間；逞臆爲談，不咨其實。」覺討論國聞，審敵自鏡之道，斷斷乎不如是。以英儒赫胥黎所著天演論爲西人新得之學說，又爲作者晚出之書，首先迄譯，以餉國人。作始於光緒丙申（一八九六），出版於戊戌（一八九八）。由是中國學者始知西人於器械精利之外，猶有湛深精闢之哲理思想，可爲吾人取鑒者在焉。復之譯是書也，行文力櫛周秦諸子，嘗謂「譯事三難：信，達，雅。求其信已大難矣。顧信矣，不達，雖譯猶不譯也。則達尙焉。今是書譯文，取明深義，故詞句之間，時有所顛倒附益，不斤斤於字比句次，而意義則不倍本文。題曰達指，不云筆譯，取便發揮。凡此經營，皆以爲達；爲達卽所以爲信也。信達而外，求其爾雅。此不僅期以行遠已耳，實則精理微言，用漢以前字法句法，則爲達易，用近世利俗文字，則求達難，審擇於斯二者之間，夫固有所不得已也。」可知其用力之勤矣。後又譯出原富社會通詮，羣已權界論羣學肄言法意等書。復之文章既高，而諸書內容又遠勝彼言之無物，自駢載道之古文，其能博學士大夫之欽仰，豈偶然哉。

林紓字琴南，福建閩縣人。爲古文，規仿桐城。試卽其畏廬文集而讀之，琢句亦頗精卓，而格局偏窄，氣機差澀，殊少當者。然以古文翻譯西方說部，則精采奕奕，自標風味。彼本不諳原文，皆憑人口述

而爲之。然於原書之談諧風趣，往往有深刻之領會，於此并力描寫，遂能倍見神采。胡適嘗謂：「古文不會做過長篇小說，林紓居然用古文譯了一多百種長篇小說，古文裏很少滑稽的風味，林紓居然用古文譯了歐文與迭更司的作品。古文不長於寫情，林紓居然用古文譯了茶花女與迦茵小傳等書。古文的應用，自司馬遷以來，從沒有這種大的成績。」琴南能爲古文開一種新境界，非特可爲介紹西洋近世文學之第一人，實足以開中國古文應用之新紀錄。我國繙譯文學，自六代所爲佛經而外，吾必以嚴氏林氏爲巨子矣。

### 述王國維

光宣之季，古文之體制格局，雖逐漸解放；至其具透切之見解，識文學之價值，爲澈底的改革論者，則惟王國維而已。國維字靜庵，浙江海寧州人。生光緒三年（一八七七）卒民國十六年（一九二七）。靜庵一生學問，截然分爲兩期：民國以前，則治文學，兼攻哲學。民國以後，則專治國故。其友羅振玉叔蘊嘗序其遺著云：「余交君二十有六年，於君學問之變化，知之爲最深。光緒戊戌，始與君相見於上海。時余年三十有三，君年二十有二，君方治東西文字；既又治泰西哲學。逮歲丁未，有靜庵文」

集之刻。戊申以後，與君同客京師，君又治元明以來通俗文興，時則有曲錄之刻；而宋元戲曲史亦屬稿於此時。然君治哲學，未嘗溺新說而廢舊聞；其治通俗文學，亦未嘗尊俚辭而薄雅故。辛亥之變，君復與余航海居日本。自是始盡棄前學，專治經史。『其治國故，新得之富，創獲之多，突過前儒，茲姑不敘。而述其對於文學之見解：靜庵以爲『生百政治家，不如生一大文學家。何則？政治家與國民以物質上之利益，而文學家則與以精神上之利益。夫精神之與物質，二者孰重？物質上之利益，一時的也；精神上之利益，永久的也。前人政治上所經營者，後人得一旦而壞之。至古今之大著述，苟其著述一日存，則其遺澤且及於千百世而未沫。故希臘之有鄂謨爾也，意大利之有唐旦也，英吉利之有狹斯丕爾也，德意志之有格代也，皆其國人人之所尸而祝之，社而稷之者。而政治家無與焉。彼等誠與國民以精神上之慰藉，而國民之所恃以生命者。若政治家之遺澤，決不能如此廣且遠也。試問我國之大文家，有足以代表全國民之精神，如希臘之鄂謨爾，英之狹斯丕爾，德之格代者乎？我人所能答也，殆無其人歟？抑有之而我人不能舉其人以實之歟？二者必居一焉。由前之說，則我國之文學不如泰西；由後之說，則我國之重文學不如泰西。前說我所不知，至後說則事實較然，無可諱也。我國人對

文學之趣味如此，則於何處得其精神之慰藉乎？『提高文學價值，即其主張改革之根本見解也。又以文學爲美術，與哲理同爲滿足慰藉人類知識感情之具。而『美術中以詩歌戲曲小說爲其頂點，以其目的在描寫人生故。』然轉而觀我國『詩歌之方面，則詠史懷古感事贈人之題目，彌滿充塞於詩界；而抒情敘事之作，什伯不能得一。其有美術上之價值者，僅其寫自然之美之一方面耳。甚至戲曲小說之純文學亦往往以懲勸爲旨。其有純粹美術上之目的者，世非惟不知貴，且加貶焉』則直以古今人爲無一得文學之眞解者，眞痛切之言，大膽之論也。

靜庵既知文學之內含爲情感，目的爲描寫人生，故特標舉『自然』爲文章之鵠，而曰：『古今之大文學，無不以自然勝。』嘗『讀元人雜劇而善之，以爲能道人情，狀物態，詞采俊拔，而出乎自然。蓋古所未有，而後人所不能髣髴也。元曲之佳處何在？一言以蔽之曰：自然而已矣。元南戲之佳處，亦一言以蔽之曰：自然而已矣。申言之，則亦不過一言曰：有意境而已矣。何以謂之有意境？曰：寫情則沁人心脾；寫景則在人目前；述事則如其口出是也。』夫文章既以自然爲貴，則凡一切格律，典故，對偶，浮詞，綺語，足以拘束自然者，皆在排除之列；而造句遣詞，用俗語必遠勝於古語。故靜庵以爲『古代

文學之形容事物也，率用古語，其用俗語者絕無。又所用之字數亦不甚多。獨元劇以許用襯字故，故輒以許多俗語，或以自然之聲音形容之。此自古文學所未有也。』又曰：『元劇實於新文體中自由使用新言語。在我國文學中，於楚辭內典外得此而三。其寫景抒情述事之美，所賴於此者，實不少也。』此言俗語之體接近自然，勝於古語也。靜庵又曰：『日本人多用雙字；其不能通者，則更以四字表之。中國則習用單字。精密不精密之分，全在於此。』俗語無單語，其質之勝於古語亦如日本語耳。國人筑舊之見，輒謂古語爾雅，俗語鄙俚。而靜庵則謂『雅俗古今之分，不過時代之差，其間固無界限也。』由是以觀，靜庵所見，與後此十餘年間胡適之陳仲甫輩所倡之文學革命論，不謀而合。惜乎世無表而出之者。而靜庵亦既引其端而不肯自竟其緒也。（所引靜庵言論，皆係辛亥以前所著者。）

## 八 清詩概述

清初詩家當以錢牧齋吳梅村爲最。牧齋才力富健，出入李杜韓白蘇陸之間，沈鬱而藻麗。高情逸致，流露篇什，允推宗工，固不可以人廢言也。梅村一字駿公，江蘇太倉人。生明萬曆三十七年（一六〇九）。崇禎進士，嘗爲東宮侍讀。明亡，退居鄉里。後爲當局所迫，出仕新朝，爲國子祭酒。康熙十年卒（一六七一）。平生以枉節自恨，臨沒，遺言斂以僧服，墓前樹一圓石，題曰詩人吳梅村之墓足矣。梅村少作大抵才華豔發，吐納風流，有清麗芊眠之致。及遭國變，閱歷興亡，激楚蒼涼，風骨彌爲遒上。其歌行一體，尤爲擅勝，格律本乎四傑，而情韻爲深；敘述類乎香山，而風華爲勝。如永和宮詞圓圓曲等一時傳誦，至諡爲詩史云。他如顧亭林詩有金石氣，吳野人（名嘉紀，江蘇泰州人。著陋軒集四卷）詩有薑桂氣，偶然落墨，天真流露，同時名輩皆未能臻此境也。遺民與遺臣之氣味，固有大不相侔者歟。

錢吳而後，則推宋琬施閏章。琬字玉叔，山東萊陽人。閏章字愚山，安徽宣城人。二人雄視南北，有南施北宋之目。琬詩以雄渾磊落勝。閏章詩以溫柔敦厚勝。頡頏施宋之間者，則有朱竹垞。（彝尊號浙江秀水人。有曝書亭集。）竹垞學最綜博，爲詩兼擅衆體，惟未純耳。至王士禛起，獨標神韻，遂爲一朝盟主。士禛字貽上，號漁洋山人。山東新城人。生明崇禎七年（一六三四）順治進士，累官至刑部尚書。康熙五十年卒（一七一）漁洋少掇巍科，所至與諸文士唱和，研求既久，造詣頗深。而一以神韻縹緲爲宗。嘗選唐賢三昧集，不錄李杜一首，而取王右丞獨多，可以見其旨趣所在。然實不免摹擬，故其甥壻趙秋谷詆爲清秀李于鱗；而洪北江亦譏其太講格律，學古人略得其神，而不能遺貌也。秋谷名執信，山東益都人。康熙進士。旋以國恤宴會被放歸，年未三十。自是徜徉林泉，踰五十年，年八十三始卒。實乾隆九年也。作談龍錄以攻漁洋。其詩以思路澀刻爲宗，欲以救漁洋一派膚廓之弊也。漁洋所著曰帶經堂集。世又別錄其詩，稱精華錄。

趙翼甌北詩話嘗稱查初白堪以繼梅村之後。初白者名慎行，浙江海寧人。少受詩法於錢澄之。又從黃梨洲遊，梨洲方之爲陸放翁。登康熙癸未進士。聖祖巡幸南海子捕魚，命羣臣賦詩，初白有：

「笠簷蓑袂平生夢，臣本煙波一釣徒」句，聖祖稱善，詔宣煙波釣徒查翰林，由此得遇。其論詩也，謂「詩之厚，在意不在詞；詩之雄，在氣不在貌；詩之靈，在空不在巧；詩之淡，在脫不在易。」蓋自明人摹唐詩，至將亡而積弊深矣，窠臼成矣。故牧齋救之以沈鬱，梅村救之以風華，初白復救之以輕靈也。初白蹤跡所及甚遠，詩篇豐富，匯爲敬業堂集五十卷。

浙西詩人自朱竹垞、查初白、宗法宋賢，繼之者復有錢塘、厲鶚、太鴻、仁和、杭世駿、大宗，而鶚尤精熟宋詩，著有宋詩紀事一百卷。其所爲詩幽深峭潔，截斷衆流。世駿則學步子瞻，並工力絕深。諸人之詩，氣韻大體相似，遂有浙派之名。同時長洲、沈德潛、歸愚雖倡爲格調之說，有清詩別裁之選，其所爲詩亦相似也。浙派之爲詩，實在矯明之弊。夫明之宗唐，但求詞句之相似，不思情理之難通，可議之處多矣。其下者則鄙險不復成詩，矯之誠是也。然矯之則必自唐入宋矣。宋之爲詩，刻畫清新，乃其本色，顧亦有以豪邁見者。獨是當時法網既密，文字之獄接踵繼興，文學之士，豈敢復矜才氣以取禍？藏鋒斂才以求免戾，外託溫厚和平之旨，實爲隱身躲避之謀，由是詩學日流於膚淺矣。此乾隆三家所以又起而救之，以才氣魄力也。

乾隆時，漁洋一派膚廓淺陋之弊，既日著，於是沈歸愚倡爲格調之說，袁子才又倡爲性靈之說。子才之詩，才氣縱橫，靈動暢達，自是名家同時，趙翼、蔣士銓氣體亦復相類，故並稱三大家。惟子才時有輕佻之處，翼詩間亦有然。士銓則具悽愴激楚之概，較爲別致。洪北江嘗論三人之詩曰：『袁簡齋如通天神狐，醉便露尾；趙雲松如東方正諫，時帶諧謔；蔣心餘如劍俠入道，尙餘殺機。』又可識其個性矣。翼字雲松，號甌北，江蘇陽湖人。登乾隆二十六年進士。卒嘉慶十九年（一八一四）。年八十八。著有甌北詩鈔五十三卷，兼好考證之學，有廿二史劄記、陔餘叢考等書。士銓字心餘，江西鉛山人。乾隆二十二年進士。四十九年卒（一七八四）。年六十。著忠雅堂詩文集二十九卷。

三家之詩，雖以才著，然實未能出宋人之範。能宗唐人而具機杼者，惟黃仲則一人耳。仲則名景仁，江蘇武進人。與洪亮吉同受業於昭文邵齊齋。專工於詩，刻意苦吟，年未三十，鬚髮皓然。著有兩當軒集。卒乾隆四十八年（一七八三）。年才三十五也。其爲詩也，初學宋人，後宗李白，成就不減青邱。當時推爲第一。自此之後，以詩名者咸推王仲瞿與大興舒位、鐵雲、昭文孫源、湘子瀟三君，而仲瞿尤雄健奇肆。

咸同之際，王壬秋號稱詩宗。值時喪亂，生人憔悴，而湘綺樓集中十九爲擬古篇章，其憂時傷感之什，反絕少見。詩人之性情固如是其淡漠耶？降及光緒，作者競法宋賢，而乃力摹江西詩派，又好雕琢，是皆傳李于鱗之衣鉢，徒現而貌，而望煞性靈者也。能矯然特立者僅一黃公度耳。公度名遵憲，廣東嘉應人。生道光二十八年（一八四八）卒光緒三十一年（一九〇五）。少好爲詩，卽能獨出心裁。嘗斥『俗儒好尊古，日日故紙研；六經字所無，不敢入詩篇。古人棄糟粕，見之口流涎，沿習甘剽盜，妄造叢罪愆。』而主張『我手寫我口。』以爲『卽今流俗語，我若登簡編，五千年後人，驚爲古爛斑。』既卜仕，歷官日本英美各國參贊公使。見聞既廣，思想更新，詩材益富。凡有詠歌，類以新思想運新詩材，遂能獨闢蹊徑。所著人鏡廬詩鈔十一卷。自云：『人各有面目，正不必與古人相同。吾欲以古文家抑揚變化之法作古詩，取騷選樂府歌行之神理入近體詩。其取材以羣經三史諸子百家及許鄭諸注爲詞賦家不常用者；其述事以官書會典方言俗諺及古人未有之物，未闢之境，舉吾耳目所親歷者皆筆而書之；要不失爲以我之手寫我之口。』此公度最確當之自白也。其宗唐者則有康長素。長素雅好杜甫，其律體流轉自如，空靈動盪，而不虛怯。戊戌以後，漫遊世界，觸景生情，一以詩發之；其

放歌長古，浩瀚滂渤，純任才氣，肆而能檢，放而不佚，誠足雄視一世矣。夫才力雄健，黃不如康，標新穎異，康不如黃，並駕齊驅，馳騁壇坫，晚清詩界，得此二美，洵足放一異彩矣。夫詩之爲物，陶寫性情，寄託懷抱，人之性情，萬有不齊，人之懷抱，後先互異，隨感而發，天地間最純粹最自然之心聲也。自唐以前，本無拘束，童謠擊壤，盡是至文，漁唱樵歌，皆含天趣。唐代以此取士，於是操觚者多矣，於是詩道亦日漸陵夷矣。蓋束齊女之腰，廣楚宮之袖，腰誠細矣，袖誠長矣，究之亂頭粗服，仍是西施。抹粉塗脂，終爲嫫母。在上者何必以此桎梏天下之士？爲士者何必以此自窒其性靈耶？清之初，雖不以詩取士，而鴻博一科亦尚詩賦，南巡數次，獻詩者亦蒙優獎，此所以學詩者多，而詩亦互相仿效以成派別也。噫！不爲名利所驅，不爲時尚所動，淵明生於華麗之時，工部自作有韻之史，此其所以曠千古而無其匹也。

## 九 清詞概述（附戲曲）

清初詩人，類善倚聲。如吳梅村之流麗穩貼，毛大可之準繩樂律，孫豹人（名枝蔚，陝西三原人）之激壯高亢，宋玉叔多商羽之音，王漁洋有冠帶之概，皆其可取者。而朱竹垞、陳其年聲聞尤著。兩君才華富麗，嘗合刻所作爲朱陳村詞，名重禁中，流傳海宇，嚮往之者實繁有徒。然竹垞好使典，不免於碎；其年好使氣，不免於率，究非大家。求其憂憂獨造，足爲冠冕者，其納蘭性德乎。而顧貞觀、曹貞吉抑其亞也。性德字容若，滿洲正黃旗人。康熙朝權相明珠之子。雖生席紛華，聰明早達，而所爲詞，悽楚哀豔，情致悱惻，逼近南唐二主，令人不忍卒讀。此非第別有懷抱，抑亦情感獨深也。著有飲水詞、側帽詞共五卷。貞觀字梁汾，江蘇無錫人。著彈指詞三卷，極情之至，出入南北兩宋，而奄有衆長。其友吳兆騫謫戍東北，梁汾嘗譜金縷曲兩闕寄之，見者無不歎爲絕唱。容若感焉，力爲納鏐救歸，亦林中豪俠之行也。貞吉字實庵，山東安邱人。著珂雪詞二卷，不爲閨襜靡曼之音，而氣韻自然，幽細綿麗，在方回

美成之間。要之爾時士夫善言風懷，此雖小道，尙存古意。自是以降，作者雖衆，往往文勝而意淺。若厲太鴻、汪對琴、張皋文諸家，乃較稱工者。太鴻詞如其詩，有一種幽蒨之美。對琴名棣，江蘇江都人，有春華閣詞生綽之致，與折之趣，蓋與太鴻爲近。皋文嘗爲詞選一書，倡言內意外之旨。其所譜上馬者，亦沈鬱疏快，悱惻纏綿，惜未能全稱耳。晚近競效夢窗，然貌合神離，則摹擬之習爲之，其可觀者蓋寡矣。

清初詩人亦偶爲戲曲。漁洋詩話云：『梅村先生之通天臺，尤悔庵之黑白衛，李白登科，激昂慷慨，可使風雲變色。自是天地一種至文，不敢以小道目之。』然世俗所流傳，則以孔東塘之桃花扇、洪昉思之長生殿爲最盛。其次則李笠翁之十種曲。東塘名尙任，字季重，自署雲亭山人，山東曲阜人，所演桃花扇共四十四齣，借侯朝宗與名伎李香君之情事，以寫明末興亡之恨，亦激昂，亦纏綿，故能膾炙人口。昉思名昇，浙江錢塘人，以太學生學詩於漁洋，頗著才名。因白香山長恨歌演曲五十齣，初成扮演，置酒高會，名流咸集。時尙在國恤，或以上聞，遂與趙秋谷並遭斥革。然自是朱門綺席，酒社歌樓，莫不奏之云。笠翁名漁，浙江蘭溪人，寄籍錢塘，著曲十種，曰風箏誤，慎鸞交，奈何天，憐香伴，比目魚，意中緣，玉搔頭，蜃中樓，巧團圓，鳳求凰，皆喜劇也。詞采明淺，滑稽動聽，流俗多用之。以言文學，則去桃花

扇長生殿遠矣。

爾後惟蔣心餘之藏園九種曲最著，曰一片石，空谷香，桂林霜，四絃秋，雪中人，香祖樓，臨川夢，第二碑，冬青樹。大抵根據事實，演以寄慨。短者數齣，長者或數十齣。典麗婉轉，不矜才使氣，自有一種蓬勃茂盛氣概。而空谷香尤足爲代表作品。餘如舒鐵雲之絃笙館修簫譜亦饒有古致。陳文述舒鐵雲傳言：『鐵雲能吹笛，鼓琴度曲，不失分釐。所作樂府院本脫稿，老伶皆可按簡而歌，不煩點竄。』則周美成之流亞矣。道咸以降，皮黃盛行，譜曲者乃不數數觀。

王靜庵有言：『我國人之精神，世間的也，樂天的也。故代表其精神之戲曲小說，無往而不著此樂天之色彩。始於悲者終於歡，始於離者終於合，始於困者終於亨。——非是，而欲鑒閱者之心難矣！若牡丹亭之還魂，長生殿之重圓，其最著之一例也。』此則我國舊戲曲思想之通病，吾人所當領會者也。

## 十 結論

綜觀清代文學，有大異於前者三事焉：一曰文字學之修述。我國造字，原本象形，後世華乳，音義代有變遷。夫殊方異言，古今異解，不通訓詁，則古書不易卒讀。且申說事理，必賴夫詞。人事日蕃，詞亦愈夥，詞富則意易達，詞窘則意常窒。而詞之基本爲字，不通字學，則文不精切，不能行遠。吾儒所以貴博學而多識也。後進頽廢，不務博習，不究字義，學殖荒落，文章譴陋，所由來也。至清代漢學大師，考古之績，越度前代，探求聲音訓詁之義蘊，而一一董理之，於是文字之讀解，釐然有當於吾心，古今間隔，洞然大啓。若據以行文，確切之詞，俯拾卽得。故曾滌生氏嘗欲以戴段錢王之訓詁，發爲揚班左國之文章。惜乎其未有所就耳。

二曰文法學之創作。夫無論何種文字，其範字以爲詞，規詞以爲句，積句以成文，必有其公認之律令，遵之則合，違之則乖，所謂文法是也。我國文字形成一種公式，爲時已歷二三千年，雖古今遞變，

略有不同，而大致相去，不甚懸殊。然論文之書盈千累萬，率皆侈談篇章，語多表象。即偶涉單字，亦僅分別虛實而止。自王引之之作經傳釋詞，而虛字之作用始明。自馬建忠作文通，而約定俗成之文法以立。承學之士，於以考見古文古語之成例，而無扞格不通之虞矣。（建忠字眉叔，江蘇丹徒人。遊學法國，歸而仿泰西格刺瑪之法而作文通十卷。）

三曰：新體文之初興。自唐宋以來，古文家之所以自重其文，莫不曰文以載道，文以經世。然求其實際，則其所謂載道者，無非稱道仁義道德，以自附於聖賢之徒。而非能樹義析理，有條成貫，以成一部著述也。其所謂經世者，無非論議得失成敗，以自騁其縱橫之辨，而非能覈論政事，訂議典憲，以裨家國建樹也。其所孳孳講求者：格也，律也，聲也，色也，神也，理也，氣也，味也。旨趣所在，唯以求文辭之工，可耀觀覽而已。其不適用直與駢儷等量。自方望溪氏建爲義法，崇尚冲穆，而規模益隘，枯虛愈甚。末流沈溺，束縛拘攣，曾不少異於時藝。故古文之敝，清末而極。有識之士，起而力謀改革。適值中外溝通，新學新知，紛紛輸入。學者偶有稱述，新學名詞時見篇章。繼考歐西文字精細縝密，剖析入微，以之紬繹名理，實有大勝於我者。故屬句行文，初亦仿效其法，久乃與之俱化，而新文體遂以形成焉。予竊以

爲我國文字，數千年一脈相承，至什法師等繙譯佛經，而始有別出之內典文學。佛法廣大，佛說善喻，南北朝野，並深慕仰。好尚既專，思潮以成，文字亦汲其流而別具一種氣象。此爲第一次大變易。至清末之新文體，爲第二次大變易。然而內典文學，特殊文學也，其誦習究不出於縉徒，猶之寒流熱流，獨往獨來，不害其爲汪洋大海也。新體文學，普通文學也，其應用遍被於全民，猶之洪濤瀾汗，激蕩奔迸，無不受其震撼者，故其變易之度，又視六代文學爲獨高也。